

# Muments nunspetgads – ma mintgatant ils pli illuminads

DA FLAVIA HOBI

■ **Tschertas chaussas van mintgatant il pli tgunsch cura ch'ins na spetga betg. Era cun scriver èsi per par part uschia.**

Il scrivent engadinais Göri Klainguti – vairamain in persuna fitg autentica e simpatica – ha formulà quai bun. El na possia betg scriver sut pressiuin e mintga giada sch'el scrivia sa sentia el sco en in siemi ch'ins na dastgia gea betg disturbar. Jau hai emprendi d'enconuscher el al seminari da minoritads a La Punt nua ch'el ha prelegi or da ses cudeschs.

In participant dal seminari ha lura dumandà Göri sch'el scrivia er en rumantsch grischun. Göri ha ditg sinceramain ch'el haja empruvà – ma ch'i n'haja betg funcziunà. Quai na fa betg surstar – jau hai era savens construcziuns tudestgas en il chau ch'jau na vegn betg dad expressiunar qualitativ medemamain en rumantsch.

Ma tge che m'ha plaschì tar Göri è la voluntad e l'avertadad ch'el ha mussà envers il rumantsch grischun. Gea – questa voluntad ed avertadad suenter tut quests onns ch'el ha adina scrit en puter – quai m'ha impressiunà.

A propos puter – la pagina «vuschs giuvnas» chatta impurtant ch'i vegnan publicgads texts en tut ils idioms e da tut las regiuns. Questa giada avain nus er ina contribuziun senza gronds peds, quai na dovri numnadamain gnanc adina. Da menziunar è era che nus avain cun Sandro Sprecher schizunt in scrivent da linguatg matern betg rumantsch – mabain cun la voluntad d'emprender el. Grazia per l'engaschi per nossa lingua, saja quai cun emprender, expressiunar, leger u simplamain viver ella!